



UNIVERSITÄTS-  
BIBLIOTHEK  
PADERBORN

## **Claudii Fleurii Abbatis Historia Ecclesiastica**

Ab anno Christi 1611. usque ad annum 1617

**Fleury, Claude**

**August. Vind. [u.a.], 1777**

**VD18 90118898**

§. 58. Præcipui Seditiois authores Cæsaris mandato proscripti.

---

[urn:nbn:de:hbz:466:1-67313](https://nbn-resolving.org/urn:nbn:de:hbz:466:1-67313)

reliqui cives fidei sacramentum dixere, Sæc. XVII.  
A. C. 1614.  
initio quidem reclamantibus Legatis,  
qui tamen pro declinando vitæ periculo ad ejusmodi machinationes connivere compellebantur.

## §. LVIII.

*Præcipui seditionis authores Cæsaris mandato proscripti.*

Nihilominus hæ turbæ nec Legatorum indulgentia, nec pœnarum comminatione adhuc extingui poterant, seditionis quibusdam civibus nova identidem molientibus: hos inter præcipui erant Vincentius Fettmilchus Dulciarius Pistor, Conradus Schoppius Sartor, & Conradus Gerngrossus arcularius. Hi erant velut Triumviri ad res in deteriorem statum præcipitandas a seipsis delecti. Sed inter hos Vincentius velut Dictator dominabatur; ad eum enim sese adjunxerant, inquietissimi quique cives, & advenarum quoque non pauci: Hic ea, quæ hucusque egisset, Authore ipsa civitate, se fecisse jactitabat, ejusque rei, cum eam, quæ tum præsens adstabat, civium multitudinem in testimonium vocaret, omnes insanis vocibus acclamabant, se testes fieri: quoniam vero tot civium flagitia, ac ipsorummet Legatorum vilipensio

*Merc. Gall.  
tom. II. l. I.*

Sæc. XVII. A. C. 1614. pensio in Sacræ Cæsareæ Majestatis contemptum manifeste redundaret, non potuit non indignanter ea ferre Imperator, præsertim cum Vincentius præcipuus ille turbarum Author novam insolentiam prioribus petulantibus adderet; cum enim substituti nuper Senatores in Curiam ut vocant, *Romanensem* convocati de exequenda Cæsaris voluntate deliberarent, ipse cum suis ferox irrumpeus, senatum perturbatæ reipublicæ infimulabat, nec his contentus, insuper convocatis in unum plerisque suæ impietatis affectis, cum iis factionis fœdus interposito etiam juramento instaurabat. Utrumque recens hoc facinus valuit ad indurandam rebellium obstinationem, atque augendum Cæsaris contemptum: quocirca Imperator proscriptionis sententia hosce seditiosos compescere statuit. Urbem igitur ingreditur Cæsareus fecialis, & alta præconum voce diras in Fettiilchum ejusque socios recitat, ac finita promulgatione valvis curiæ proscriptionis decretum affigere parat, præfatus, *Ita mandare Cæsaream Majestatem:* obnuitur Fettiilchus ingenti tumultuantium multitudine circumfusus, ac ceteris petulantior, *ita fieri se nolle* exclamat, & Caroli IV. privilegio Francofordienses proscribi haud posse vociferatur. Tunc primum, quasi signo dato,

dato, rebellium exarsere studia, ac fe- Sæc. XVII.  
 cialis metu mortis absterritus, infecta A. C. 1614.  
 re, cum suo edicto in diversorium auf-  
 fugere cogitur. Tanta petulantia irri-  
 tati Principum Legati, Cæsaris nomi-  
 ne, tradi sibi seditionis triumviros in  
 catenis jusserunt, perperam vero ab eis  
 Carolinam immunitatem fuisse allega-  
 tam declararunt. Verum hi ab eo die  
 perniciosius quam unquam, obvios  
 quosque ad vindicandam proscriptionis  
 contumeliam concitabant. Displicuit  
 tamen nimia hæc audacia nonnullis ci-  
 vium societatibus antea huic rebelli ad-  
 dictis, quocirca se deinceps in potestate  
 Legum & Imperatoris fore profiteban-  
 tur, inque obsequii sui fidem in Album  
 nomina sua referebant, ita suadentibus  
 Principum Legatis: id vero ubi com-  
 pererat Fettmilchus, cum suis in Cu-  
 riam provolat, & horum nominum Syl-  
 labum sibi tradi jubet, eo fine, ut hosce  
 tanquam suæ conjurationis proditores  
 jugulare posset. Cum autem hæc &  
 similia civibus adhuc integris ac mode-  
 ratoribus haud diutius toleranda vide-  
 rentur, deliberatum de Viro, qui con-  
 jurationis triumviros comprehendere  
 auderet. Opportune se iniquitatis vin-  
 dicem obtulit Joannes Martinus Bauer  
 seu Agricola antiquioris Ordinis Sena-  
 tor, qui quantocyus valida militum ma-  
 nu

Sæc. XVII. nu stipatus, die vigesima septima No-  
A. C. 1614. vembris Fettmilchum genialiter in ta-  
 berna vinaria potantem aggressus est, extortoque sclopo, quo nefarius Sena-  
 torem petere parabat, captum ad tur-  
 rim Bornheimianam deduxit: Ibi pesti-  
 lens hic homo nihilo sedatior, sed effe-  
 rator factus, clamoribus plusquam insa-  
 nis suos, ut ad eripiendum se concur-  
 rerent, exorabat: Fit igitur ab his nul-  
 la mora in Turrim impetus, qui etiam  
 effractis vi portis Fettmilchum eripiunt,  
 & velut in triumphum ovantes per  
 plateam publicam deducunt, eumque  
 domui suæ restituunt, ad quam mox  
 petulantissimi quique magno numero  
 confluxere, adversus Magistratum arma  
 paraturi. Haud segnior erat Agricola,  
 qui cives sibi fidos in ordines & arma  
 cogens, recta ad rebellis ædes conten-  
 dit, ac seditiosos ad deditionem provo-  
 cat. Profuit intrepidus hujus Viri au-  
 sus; rebelles enim suorum numero dif-  
 fusi, petita impetrataque alterni sermo-  
 nis copia, profitebantur, se in potesta-  
 te Cæsaris & Optimatum fore: Tum  
 vero partim fuso, fugatoque cetero per-  
 duellium grege, Fettmilchus & Schop-  
 pius stipantibus armatis in carceres die  
 vigesima octava Novembris reducuntur,  
 quos quarto post die Agricola Mogunti-  
 nis in manus & catenas tradidit.

§. LIX.